

दिनांक 21.02.2025
समय: 18.45 बजे

आकाशवाणी जयपुर-अजमेर

प्रादेशिक समाचार

- कांग्रेस रा प्रदेश अध्यक्ष गोविंद सिंह डोटासरा समेत पार्टी रा छह विधायक बजट सत्र रा बच्योड़ा दिनां सारु निलम्बित करी ज्या।
- प्रदेश भाजपा अध्यक्ष रा चुनाव सारु नाम-पाना दाखिल करण रो काम पूरो व्हयो- मदन राठौड़ रो ओजू प्रदेश अध्यक्ष बणबो तैय।
- प्रधानमंत्री नरेन्द्र मोदी नई दिल्ली मांय **सोल कॉन्क्लेव** रो उद्घाटन कीनो-कह्यो-देश ने हर हलका मांय ऊर्जावान नेतावां री ज़रूरत।
- राज्यपाल हरिभाऊ बागडे खुद रा विकास अर स्वस्थ जीवन शैली सारु योग अभ्यास ने ज़रूरी बताया।

000

विधानसभा आज कांग्रेस रा प्रदेश अध्यक्ष गोविंद सिंह डोटासरा समेत 6 विधायकां ने बजट सत्र रा बाकी दिनां सारु निलंबित करण रो प्रस्ताव पास कर दीनो। सदन मांय विपक्ष रा सदस्यां कानी ऊं हंगामो करता थकां आसन री ओर बढ़बा रा वाकया ने गंभीरता ऊं लेता थकां आ कार्यवाही करी ज्यी। कांग्रेस रा विधायक ई कार्यवाही रे खिलाफ सदन मांय धरणो दे रह्या है। ज्यीं बगत सदन मांय सरकारी मुख्य सचेतक जोगेश्वर गर्ग ओ प्रस्ताव पेश कर रह्या हा, वां बगत ई कांग्रेस रा विधायक वेल मांय नारा लगा रह्या हा। हंगामा अर नाराबाजी बीचे जोगेश्वर गर्ग कांग्रेस रा सदस्यां श्री डोटासरा, रामकेश मीणा, अमीन कागज़ी, जाकिर हुसैन गैसावत, हाकिम अली खान अर संजय कुमार ने बजट सत्र रा बच्योड़ा दिनां सारु निलंबित करण रो प्रस्ताव पेश कीनो, ज्यीं माथे वोटिंग करायां पाछे स्पीकर आं सदस्यां ने निलंबित कर दीना। कांग्रेस रा विधायक प्रश्नकाल रे दौरान सामाजिक न्याय अर अधिकारिता मंत्री अविनाश गहलोत रा विवादित बयान री खिलाफत करता थकां वेल मांय जा र नारा लगावण लाग्या। इण ई दौरान कुछ विधायक सचिव री कुर्सी ताई पूग ग्या। हंगामा रे कारण आज सदन री कार्यवाही दो दफा टालणी पड़ी। विधानसभा री कार्यवाही अब 24 फरवरी ने संवारे 11 बज्यां ओजू सरु व्हेला।

000

राज्यसभा सदस्य अर प्रदेश भाजपा रा मौजूदा अध्यक्ष मदन राठौड़ रो ओजू पार्टी रा प्रदेश अध्यक्ष बणबो लगभग तय व्हे ग्यो है। भाजपा रा प्रदेश अध्यक्ष रा चुनाव री प्रक्रिया रा तहत श्री राठौड़ आज चुनाव प्रभारी विजय रूपाणी ने वां रो पर्चो सूप्यो। ई मौके मुख्यमंत्री भजनलाल शर्मा, उपमुख्यमंत्री दिया कुमारी अर डॉ. प्रेमचंद बैरवा अर पैली वाळी मुख्यमंत्री वसुंधरा राजे ई मौजूद हा। नामपाना दाखिल करण रो काम पूरो व्ह्यां पाछे श्री रूपाणी खबरनवीसां ने बतायो के ई सागे ई राष्ट्रीय परिषद सारु ई 25 सदस्य चुण्या जावेला। आज ई सारु ई पर्चा दाखिल करी ज्या। रूपाणी कह्यो के भाजपा रा प्रदेश अध्यक्ष ओहदा सारु चुणाव रा नतीजा रो काल संवारे 11 बज्यां ऐलाण कर्यो जावेला।

.....

000

प्रधानमंत्री नरेन्द्र मोदी 24 फरवरी ने प्रधानमंत्री किसान सम्मान निधि री 19 वीं किस्त जारी करेला। केन्द्रीय कृषि अर किसान कल्याण मंत्री शिवराज सिंह चौहान आज नई दिल्ली मांय खबरनसीसा ने आ जाणकारी दीनी। वे बतायो के बिहार रा भागलपुर मांय राख्या जावण वाळा कार्यक्रम मांय आ रकम जारी करी जावेला। श्री चौहान कह्यो के इण ऊं देश भर रा अढाई करोड़ किसानां ने फायदो मिलेला।

000

उपराष्ट्रपति जगदीप धनखड़ कह्यो है के चिंता मानसिक स्वास्थ्य री गंभीर चुनौती रा तौर ऊं काम करे है। वे आज नई दिल्ली मांय ध्यान रा वैश्विक सम्मेलन मांय बोल रह्या हा। श्री धनखड़ कह्यो के ई सम्मेलन री प्रासंगिकता वसुधैव कुटुम्बकम् री जूनी रीत ऊं मिले है। श्री धनखड़ भारत ने पांच हजार साल जूनी अनूठी सभ्यता अर दुनिया रो सांस्कृतिक केंद्र बतायो।

000

प्रधानमंत्री नरेन्द्र मोदी कह्यो है के देश ने हर हलका मांय ऊर्जावान नेतावां री जरूरत है। वे आज नई दिल्ली मांय स्कूल ऑफ अल्टीमेट लीडरशिप—सोल कॉन्क्लेव रा पहला संस्करण रा उद्घाटन सत्र मांय बोल रह्या हा। श्री मोदी कह्यो के मानव संसाधन रो देश रा विकास मांय खास काम व्हे है। प्रधानमंत्री कह्यो के देश ने नवाचार अर कौशल बधावण वाळां साधनां री जरूरत है।

प्रधानमंत्री भरोसो जतायो के सोल वां नेतावां ने गढ़ेला जो राष्ट्रीय अर विश्व स्तर माथे बेहतरनीन काम कर सके है। वे कह्यो के स्कूल ऑफ अल्टीमेट लीडरशिप खुलणो विकसित भारत री दिशा मांय खास कदम है। दो दिन रा सोल लीडरशिप कॉन्क्लेव मांय राजनीति, खेल, कला और मीडिया, आध्यात्मिक दुनिया, सार्वजनिक नीति, कारोबार अर सामाजिक हलका रा लोग वां री जीवन यात्रा रा सीख देवण वाळा अनुभव साझा कर रह्या है।

000

प्रधानमंत्री नरेन्द्र मोदी आकाशवाणी ऊं हर महीना प्रसारित कर्या जावण वाळा खास कार्यक्रम मन की बात मांय ई दीतवार 23 फरवरी ने संवारे 11 बज्यां विचार बतावेला। आ ई कार्यक्रम री 119वीं कड़ी व्हेला। ओ कार्यक्रम आकाशवाणी अर दूरदर्शन रा पूरा नेटवर्क, एआईआर न्यूज वेबसाइट अर न्यूज ऑन एयर, मोबाईल एप माथे प्रसारित कर्यो जावेला। ई सागे ई ई कार्यक्रम रो आई आर न्यूज, डीडी न्यूज, पीएमओ अर सूचना अर प्रसारण मंत्रालय रा यू-ट्यूब चैनलां माथे ई प्रसारण कर्यो जावेला।

000

लारला दिनां विधानसभा मांय पेश करी ज्या राज्य बजट मांय हर ग्राम पंचायत मांय बर्तन बैंक खोलण रो ऐलाण करी ज्यो। ई रा पहला दौर मांय एक हजार ग्राम पंचायतां ने एक-एक लाख रुपया रा बर्तन मुहैया कराया जावेला। झुंझुनूं जिला रा बुहाना हलका री लांबी अहीर ग्राम पंचायत रो ओ मॉडल पूरा प्रदेश मांय लागू कर्यो जावेला। पेश हँ एक रपट—

000

राज्यपाल हरिभाऊ बागडे कह्यो है के योग खुद रा विकास रो सब ऊं मोटा जरियो है। श्री बागडे आज जयपुर ग्रेटर नगर निगम री ओर ऊं राख्यी ज्या योग साधक सम्मान समारोह मांय बोल रह्या हा। वे सगळा ऊं रोजीना योग अभ्यास करण री अरज कीनी। ई मौके राज्यपाल 1 हजार 611 मिनट ताई लगातार योग कर र विश्व कीर्तिमान बणावण मांय खास काम करण वाळा योगाचार्या, योग री सिखावण देवण वाळां अर योग प्रेरकां रो मान कीनो। जळसा मांय राज्यसभा रा सदस्य

मदन राठौड़, जयपुर री सांसद मंजू शर्मा, जयपुर ग्रेटर नगर निगम री महापौर सौम्या गुर्जर ई योग संस्कृति ने ओर बधावण री अरज कीनी।

000

आज अंतराष्ट्रीय मातृ भाषा दिवस है। भाषायी अर सांस्कृतिक विविधता रा बारा मांय जाग जगावण रा मकसद ऊं पूरी दुनिया मांय ओ दिन मनायो जावे है। यूनेस्को री ओर ऊं मान्यता प्राप्त ओ दिन मायड़ भाषा ने बचावण अर भाषायी विविधता रा महत्त्व माथे जोर देवे है। पेश है बलोतरा ऊं म्हाणा श्रोता रो संदेश –

000

कोटा रा संभागीय आयुक्त राजेन्द्र सिंह शेखावत आज झालावाड़ जिला री गोविन्दपुरा ग्राम पंचायत मांय एग्रीस्टैक योजना रा तहत लगायी ज्या किसान रजिस्ट्री शिविर रो दौरा कीनो। संभागीय आयुक्त शिविर मांय किसानां ने 11 अंकां री विशिष्ट फार्मर आईडी रे मार्फत आवता बगत मांय मिलण वाळा फायदां री जाणकारी दीनी। वे कह्यो के विशिष्ट फार्मर आईडी रे मार्फत प्रधानमंत्री आवास योजना, प्रधानमंत्री किसान सम्मान निधि समेत न्यारी-न्यारी योजनावां रो फायदो मिलण अर खरीद केन्द्रां माथे उपज री खरीदी अर फसल बीमा योजनां रा तैत दावा मांय आसानी व्हेला। सलूबर रा जिला कलक्टर अवधेश मीना ई आज समोडा मांय लगायी ज्या शिविर रो दौरा कर र ज़रूरी हुकम दीना।

000